

Hubacher fa compliments sco stiletadas

«Micheline, Moritz, Merz + Co.» – ina divertenta e simpla analisa politica

■ **(anr/vi) Era insatgi che na chapescha nagut da politica, sa senta svelta da chassa en il nov cudesch da Helmut Hubacher. «Aktenzeichen CH» è in pledoier per la vita politica svizra: frestg e sincer.** Helmut Hubacher ha prendì cumià da la politica avant set onns. Il politicher basileis è stà 34 onns en il cussegl nazional, 15 onns ha el presidià la Partida socialdemocrata. Ses cudesch na sa fatschenta betg cun «tempi passati», mabain cun la politica dad oz. Sin las 230 paginas na chattan ins gnanca in soli pled cumplitgà. Hubacher persvada cun ina lingua simpla. El enzuglia ses raquints cun in'ironica che procura ch'ins na metta il cudesch betg or da maun fin ch'ins ha legì el.

Blocher e Schmid

Hubacher prenda sut la lupa ils cussegliers federali. In suenter l'auter vegn analysà ed apostrofa cun titulaziuns pregnantas. «Blocher na di betg ch'el veglia daventar cusseglier federal. Na, el di ch'el stoppia far quai. El fa, sco sche l'elecziun en il cussegl federal fiss in act d'unfrenda. Il tef missionaric irritescha. I manca be anc la missiun divina.»

Hubacher skizzescha senza resalvas era las qualitads da Blocher e manegia: «Sch'el sa fida da sias competenzas d'um da fatschenta, pudess el reussir.»

Cusseglia federal Schmid «glima gugent vi da detagls e po fitg darar sa decider fitg svelta per insatge».

E dal departament da Schmid di Hubacher: Be paucs politichers hajan tegnì ora ditg en il departament nua ch'ils militarists decidian. Il schef haja be da far per cumond. Plinavant: Cura che la Partida sociala haja vulì smesar l'armada, eran las partidas da dretg schoccadas. «Oz na vegn l'armada betg sulet smesada, mabain filetada.»

Couchepin e Merz

Suenter ils 10 da december han ins pensà ch'ils quatter cussegliers da la pld e pps, la uschènumnada «Viererbände», cumondian las festas. Che quai n'è betg succedi, saja d'engraziar a Couchepin. «Il Vallaisan è in um interessant. Atgnamain ina figura da clav.»

Da sunar la segunda gegia suenter Blocher na vegnia betg en dumonda per Couchepin.

Avant sia elecziun saja Merz vegnì descrit sco politicher da finanzas fitg competent perquai ch'el haja presidià la

cumissiun da finanzas. Hubacher di che quai saja be «sa gloriem»: Ils presidis da cumissions vegnan numnadamain re-partids tenor in turnus. «Tgi ch'è ditg avunda en il parlament, vegn segir inagiada president d'ina cumissiun.» Merz saja vegnì elegì per schliar problems, betg per crear els. «Ma exact quai fa el.»

Sia proposta ch'ils ritgs na duain betg pli retrair l'AVS saja stada ina tuppada penibla. I saja bain vair ch'ils ritgs n'hajan betg da basegn da l'AVS. L'AVS perencunter saja dependenta dals ritgs che pagan autas contribuziuns.

Leuenberger e Calmy-Rey

«Il cusseglier federal da la pss maina ina gronda buda: ambient, energia, traffic, communicaziun. A l'exteriur dess quai lavur per trais u quatter ministers. Atgnamain administrescha el detg bain il manaschi mamutesc.»

Ils signurs da la pps crititgeschian Moritz Leuenberger savens uschè massiv ch'ins pudess tgisar els pervi da disfamaziun, scriva Hubacher.

«Il start da Micheline Calmy-Rey è stà fulminant.» Ella haja svelta mess ferm accents en la politica da l'exteriur. Entant che Deiss e Cotti avevan surlaschè la diplomazia a lur schef-diplomats, haja Calmy-Rey prendì las hottas enta maun.

Hubacher constatescha che Calmy-Rey possia rir sin duas modas: sco Dimitri, ma era sco ina glatschera. Ella possia esser fitg severa.

Cumplements cun palas per Deiss

«Joseph Deiss è biling. Ni Romand ni Tudestg. Insaco va quai a prà cun el. Tgi e tge è Deiss atgnamain?» Cumplements pon esser sco stiletadas. Cunzunt quels che Hubacher fa cun il minister d'economia. «Deiss è in econom studegià. In scienzià pia. Retoricamain in perdert che discorra a moda lungurusa.»

Hubacher conceda dentant era che Deiss sa chatta en ina situaziun difficila cun il departament d'economia che s'occupa era dals dischoccupads. Pertge: Ils managers siemian da gudogns astronomici sco en l'America e veglian be pli conceder pajas chinaisas als em-ploiad.

Helmut Hubacher: «Aktenzeichen CH».
Chasa editura Zytglogge. 230 paginas.
36 francs. Oberhofen 2004.

